

I. DISPOSICIÓN XERAIS
PRESIDENCIA

Lei 1/2001, de 22 de xaneiro, de creación do
Colexio de Educadores Sociais de Galicia.

O Real Decreto 1420/1991, de 30 de agosto, establece o título universitario oficial de diplomado en educación social. As ensinanzas conducentes á obtención do título oficial de diplomado en educación social orientaranse á formación dun educador nos campos da educación non formal, educación de adultos, inserción social de persoas desadaptadas e minusválidas, así como na acción socioeducativa.

A creación do Colexio Profesional de Educadores Sociais de Galicia, que permitirá dotar a estes profesionais dunha organización capaz de velar polos seus intereses e ordenar o exercicio da profesión, enténdese como unha garantía para os sectores sociais máis desfavorecidos, ós que se dirixe a acción de aqueles.

De acordo co establecido no artigo 36 da Constitución española, seguindo o previsto no artigo 27.2º do Estatuto de autonomía de Galicia, na Lei orgánica 16/1995, de 27 de decembro, de transferencias de competencias á Comunidade Autónoma de Galicia, no Real decreto 1643/1996, de 5 de xullo, de traspaso de funcións e servizos da Administración do Estado en materia de colexios oficiais ou profesionais, e no Decreto 337/1996, de 13 de setembro, da Xunta de Galicia, sobre asunción de funcións e competencias a que se refire o real decreto citado, todo isto en relación co disposto no artigo 4.1º e demais concordantes da Lei 2/1974, de 13 de febreiro, de colexios profesionais, modificada pola 74/1978, de 26 de decembro, modificada tamén pola Lei 7/1997, de 14 de abril, de medidas liberalizadoras en materia de solo e de colexios profesionais, prevese con esta lei a creación do Colexio de Educadores Sociais de Galicia.

Por todo o exposto o Parlamento de Galicia aprobou e eu, de conformidade co artigo 13.2º do Estatuto de Galicia e co

artigo 24 da Lei 1/1983, de 23 de febreiro, reguladora da Xunta y do seu presidente, promulgo en nome de O-Rey a Lei de creación do Colexio de Educadores Sociais de Galicia.

Artigo 1º

Créase o Colexio de Educadores Sociais de Galicia, como corporación de dereito público, con personalidade xurídica propia e plena capacidade de obrar para o cumprimento dos seus fins.

Artigo 2º

O ámbito de actuación do colexio será o territorio de Galicia.

Artigo 3º

1. Podrán integrarse no Colexio de Educadores Sociais de Galicia os profesionais que estén en posesión do título de diplomado universitario en educación social, así como aqueles que se atopen nalgún dos supostos previstos na disposición transitoria segunda, despois da correspondente habilitación.

2. Será requisito para exercer a profesión de educador social no ámbito da Comunidade Autónoma de Galicia a incorporación ó Colexio de Educadores Sociais de Galicia cando o domicilio profesional único ou principal radique nesta comunidade.

Disposicións transitorias

Primeira

1. Seis membros da Asociación de Educadores Sociais de Galicia e un número igual de representantes dos/as diplomados/as universitarios/as en educación social, designados éstos pola Consellería de Xustiza, Interior e Relacións Laborais, de acordo con criterios de representación territorial, actuando como comisión xestora deberán aprobar no prazo de seis meses a partir da entrada en vigor desta lei uns estatutos provisionais do Colexio de Educadores Sociais de Galicia. Nos citados estatutos deberá regularse a asemblea colexial constituínte, coa

previsión da forma de convocatoria y do procedemento de desenvolvemento dela.

A convocatoria da asemblea constituínte deberá realizarse no prazo máximo dun mes, contando dende a finalización do procedemento de habilitación, e deberá anunciarse, como mínimo, con vinte días de antelación no *Diario Oficial de Galicia* e en dous xornais dos de maior difusión de Galicia.

2. A asemblea constituínte deberá:

- a) Elaborar e aprobar os estatutos definitivos do colexio.
- b) Elixir os membros dos seus órganos colexiais de goberno.

Segunda.

1.- A comisión xestora á que se refire a disposición transitoria primeira, constituída en comisión de habilitación, coa incorporación de tres representantes das universidades que impartan en Galicia os estudos de educación social e tres expertos designados por maioría dos anteriores, deberán habilitar, se procede, ós profesionais que soliciten a súa incorporación no colexio.

2.- Poderán integrarse no Colexio de Educadores Sociais de Galicia aquelas persoas que, despois da súa solicitude de habilitación dentro dos dezaoto meses seguintes á data de publicación desta lei, se atopen nalgún destes supostos:

- a) Primeiro suposto.

Aquelas persoas que cursasen estudos específicos dun mínimo de tres anos académicos, iniciados antes do curso 1994/1995, e xustifiquen documentalmente tres anos de dedicación plena ou principal en tarefas propias do educador social, dentro dos doce anos anteriores á entrada en vigor desta lei.

Consideraranse estudos profesionais específicos os realizados, no ámbito de Galicia, na Escola de Educadores Especializados en Marxinación Social, e, no ámbito do resto do Estado, os debidamente xustificadas.

- b) Segundo suposto.

Todas aquelas persoas que acrediten titulación universitaria, licenciatura e/ou diplomatura, en estudos iniciados antes do curso 1994/1995, con tres anos de experiencia na profesión, con carácter de dedicación plena ou principal, acreditada documentalmente, dentro dos quince anos anteriores á entrada en vigor desta lei.

- c) Terceiro suposto.

Todas aquelas persoas que acrediten documentalmente oito anos de exercicio a dedicación plena ou principal nas tarefas propias do/a educador/a social levadas a cabo nos vinte anos anteriores á entrada en vigor desta lei.

Terceira.- Os estatutos definitivos, despois de ser aprobados, xunto co acta da asemblea constituínte, remitiranse á consellería competente en materia de colexios profesionais para a cualificación da súa legalidade, e, se é o caso, publicación no *Diario Oficial de Galicia*.

Disposición final

Esta lei entrará en vigor ó día seguinte ó da súa publicación no *Diario Oficial de Galicia*.

Santiago de Compostela, 22 de xaneiro de 2001

Manuel Fraga Iribarne

Presidente

